

**BOSNA I HERCEGOVINA
FEDERACIJA BOSNE I HERCEGOVINE**

**KANTON SARAJEVO
SKUPŠTINA KS
VLADA KS
PREMIJER KS
MINISTARSTVO ZA ODGOJ I OBRAZOVANJE KS**

Na osnovu člana 106., a u vezi sa članom 213. Poslovnika Skupštine Kantona Sarajevo („Službene novine Kantona Sarajevo“, broj: 41/12 - Drugi novi prečišćeni tekst, 15/13, 47/13, 47/15 48/48/16, 9/20, 14/20, 16/22 i 17/22-Ispravka), pokrećem:

**INICIJATIVU: HITNO POVEĆANJE KAPACITETA ISPITIVAČA ZA POLAGANJE
VOZAČKIH ISPITA U KANTONU SARAJEVO**

OBRAZLOŽENJE:

Podnosim inicijativu kojom se od Ministarstva za odgoj i obrazovanje Kantona Sarajevo traži hitno poduzimanje mjera radi prevazilaženja problema u procesu polaganja vozačkih ispita.

Naime, nakon akcije koju su u januaru 2026. godine proveli Ministarstvo unutrašnjih poslova Kantona Sarajevo i Tužilaštvo Kantona Sarajevo, a koja se odnosila na članove ispitne komisije za polaganje vozačkih ispita, došlo je do značajnog smanjenja broja aktivnih ispitivača iz oblasti upravljanja motornim vozilom. Prema dostupnim informacijama, trenutno su aktivna svega dva člana komisije, dok treći povremeno učestvuje u radu. Ovakva situacija dovela je do ozbiljnog zastoja u procesu organizovanja i provođenja vozačkih ispita. Kandidati koji se prijave za polaganje vozačkog ispita u Kantonu Sarajevo trenutno čekaju i 20 ili više dana na termin polaganja, što predstavlja veliki problem kako za same kandidate tako i za autoškole koje provode obuku.

Kanton Sarajevo je najbrojniji kanton u Federaciji BiH po broju stanovnika, te samim tim ima i najveći broj kandidata koji polažu vozačke ispite. Smanjen kapacitet ispitne komisije direktno utiče na efikasnost sistema, produžava čekanje kandidata i uzrokuje značajne finansijske i organizacione probleme za autoškole. Posebno treba naglasiti da se naknade za polaganje vozačkog ispita uplaćuju u Budžet Kantona Sarajevo, te usporavanje procesa polaganja ima i direktne fiskalne posljedice po kantonalni budžet.

Udruženje autoškola i instruktora Kantona Sarajevo, prema dostupnim informacijama, već se obraćalo nadležnom ministarstvu sa zahtjevom za sastanak radi rješavanja ovog problema, međutim do realizacije sastanka nije došlo.

Zbog navedenog predlažem sljedeće:

- Da Ministarstvo za odgoj i obrazovanje Kantona Sarajevo hitno poduzme mjere za povećanje broja ispitivača iz oblasti upravljanja motornim vozilima.
- Da se, zbog nastale vanredne situacije, privremeno angažuju dodatni licencirani ispitivači kako bi se smanjile liste čekanja za polaganje vozačkog ispita.
- Da se u najkraćem roku izvrši organizacijsko jačanje kapaciteta ispitnih komisija kako bi se omogućilo redovno i efikasno održavanje ispita, smanjile liste čekanja i spriječile daljnje štete za kandidate, autoškole i Budžet Kantona Sarajevo.

U Sarajevu, 06.03.2026. godine

ZASTUPNIK SDA U SKS
Adi Kalem